

Metro

Noord Sport

Naka Bulle amper in Goue-beker

Morris Gilbert

Die Naka Bulle het die afge-lope Saterdag vir alle praktiese doeleindes van deelname aan die nasionale Goue-beker-kampioenskapsreeks seker gemaak en daardeur sigbaar gestalte gee aan hul 2018-driekunsdroom.

Hoewel dit nog nie amptelik is dat Naka die Blou Bulle se verteenwoordiger sal wees nie, plaas die Mooters se stewige posisie op die Carltonliga-puntelys (1ste ná 4 wedstryde met 17) hul-le in 'n sterk posisie. Naka het in sy oorblywende twee Carltonliga-wedstryde, teen QBR op 9 Junie en UP-Tuks op 21 Julie, net 'n enkele bonuspunt nodig om van die eerste regmerk op sy 2018-vorderingsverslag seker te maak.

Naka se sege oor Centurion bring ook mee dat die heront-moeting met UP-Tuks die nie-

amptelike Carltonbeker-finaal kan wees. UP-Tuks het 15 punte ná hul drie wedstryde in die eer-ste ronde en gegewe dié span se indrukwekkende onoorwonne vertoningslys tot nou toe sal hy moeilik uit die eerste plek gehou word. Met dié dat die Carlton-liga as deel van die tussen-pro-vinsiale Superliga beslis word, is weggedoen met 'n eindstryd en word die Bloubul-kampioen bepaal deur die span wat ná die ligafase die hoogste op die pun-telys geplaas is. Dat UP-Tuks en Naka se laaste wedstryd juis teen mekaar is, getuig van insig aan die kant van die BBRU-bepa-lingskomitee.

Die herontmoeting tussen Na-ka en Centurion was allermins so eensydig soos die eerste. Die grootste verskil dié keer was die mate waartoe Naka sy teenstan-ders se foute uitgebuit het. Cen-turion kan homself skop dat hy soveel gulde aanvalsgeleenthede



Louis van Biljon, agtsteman van die Naka Bulle, op pad doellyn toe in die wedstryd teen Centurion.

Foto: JOHANNA DE VOS

met kritieke foute op of naby Naka se doellyn verspeel het. Dit het Naka keer op keer in staat gestel om verdediging in aanval te omskep en in die eerste helfte twee langafstand-drieë te druk. Omgekeerde balbesit is soos koningskos vir Naka.

Centurion verdien 'n pluimpie vir die mate waartoe hy kopge-hou het nadat sy agtsteman knap voor rustyd weens 'n boor-vat met 'n rooi kaart gestraf is. Dis ironies dat Centurion juis beter afgerond het toe hy met 14 spelers moes klaarkom.

UP-Tuks het weens Brakpan se onttrekking nie 'n liga-bepa-ling gehad om na te kom nie,

maar het wel in 'n vriendskapli-ke wedstryd teen 'n Blou Bul-vyftiental koning gekraai. Dit was 'n baie fisieke wedstryd, wat deeglike voorbereiding was vir die uitdagings wat Saterdag op UP-Tuks in sy herontmoeting met QBR wag. Sedert dié twee spanne in die eerste ronde slaags geraak het, het QBR be-duidend verbeter, soos uit sy vertonings teen eers Springs en toe East Rand United in wegwed-stryde blyk.

UP-Tuks kan baie in sy nop-pies wees met die afgeronde ver-toning teen die Bulle. Baie op-merklik was die verbetering in UP-Tuks se dissipline wat mee-

gebring het dat hulle die eerste keer dié seisoen nie kaartootre-dings begaan het nie.

Naka speel weg teen Springs en 'n groot drag slae kan weer die Oos-Randers se voorland wees.

■ Uitslae (soos verskaf deur Johanna de Vos):

Eerstes: Naka Bulle 38, Centurion 22; QBR 38, ERU 32; Impala 75, Springs 14; UP-Tuks 20, Blou Bulle XV 12.

Tweedes: Naka Bulle 52, Centurion 7; Tuks-Fezelas 38, Grizzlies I 27; TUT I 36, QBR 22.

Derdes: Naka Bulle 40, Centurion 5; QBR 23, TUT II 19; Grizzlies II 31, Tuks-Pumas 14.